

Камтарликда барчамизга ибрат зот



11:00 / 31.12.2020 1828

Маълумки, махлуқотларнинг афзали инсон.

Инсонларнинг афзаллари Пайғамбарлар алайҳимуссалом.

Пайғамбарларнинг афзали Муҳаммад соллаллоҳу алайҳи васаллам.

Эсланг! Муҳаммад соллаллоҳу алайҳи васаллам еттинчи осмонга кўтарилдилар, Сидратул Мунтаҳога етдилар. Ерга қайтгач, аҳли оилалари хизматида бўлдилар. Қўйларини ўзлари соғардилар, шиппакларини ўзлари тикардилар.

Нафақат пайғамбарлардан, балки бутун инсониятдан афзал бўлган зот соллаллоҳу алайҳи васаллам ерга ўтирардилар.

Ерда ухлардилар.

Кийимларини ўзлари ямардилар.

Бирор нарсага суюнмасдан, камтарлик, хоксорлик билан таом ердилар.

Беморларни ўзлари кўргани борардилар.

Етимларга меҳрли, мушфиқ эдилар.

Болалар билан ўйнаб, уларни хурсанд қилардилар.

Ҳаммадан олдин салом берардилар.

Доим табассум билан боқардилар.

Очлик шиддатини пасайтириш учун муборак қоринларига тош боғлаб юрардилар.

Камбағал, ночор кимса меҳмондорчиликка чақирса ҳам борардилар.

Бирорта қул келиб, ўзи ҳақида ҳожаси олдида гаплашишларини илтимос қилса, бориб, унинг илтимосини бажарардилар.

Еттинчи осмонга кўтарилдилар, (Ерга қайтгач) мискинлар билан бир товоқдан таомланардилар, ҳачирларини минардилар, қўшинга дарахтни кесмаслик, ёш болани, аёлни ўлдирмаслик, ибодатхонадаги роҳибларга тегмасликни буюрардилар.

Аллоҳ таоло севикли Пайғамбаримиз соллаллоҳу алайҳи васалламни шундай васф қилган:

﴿مِطْعَةٍ قُلُوبِ لَعَلَّ كُنْأُو﴾

«**Ва албатта, сен буюк хулқдасан**» (Қалам сураси, 4-оят)

У зот соллаллоҳу алайҳи васаллам буюк хулқ соҳиби эдилар. Камтарлик, тавозу ана шундай буюк хулқлардан биридир.

Пайғамбаримиз соллаллоҳу алайҳи васаллам самоларга кўтарилишдан олдин улуғ эдилар, тушганларидан кейин ҳам улуғликларича қолдилар.

Такаббурсиз улуғ эдилар.

Ўзларини катта олмай буюк эдилар.

Аллоҳ таоло у зотга чексиз саловот ва саломлар юборсин!

Мустафо Маҳмуднинг «Муҳаммад соллаллоҳу алайҳи васаллам» китоби асосида Нозимжон Ҳошимжон тайёрлади